

**AGENDRE TRINITATIS**

MINGGU 07 JULI 2024

**1. FANGOWAI BA FOGAONI**

*(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).*

- Fangowai** :  
**SA** : Ya'ami banua Zo'aya, Ya somuso tödö ba sowuawua tödö ami ba we'amöi föna Keriso ma'ökhö andre. Ma'owai Ami fefu, : Ya'ahowu.  
**SATO** : Ya'ahowu !  
**SA** : Ya faofao khömi Lowalangi...  
**SATO** : Ya fao Khöu Geheha-Nia  
**Fogaoni** :  
**SA** : Da ta'owuawua'ö dödöda wangondrasi Yehowa, da ta'omusoi'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero 3**

**3. MASUNO' Ö YEHOWA**

do = f 3/4

MM = 96 - 104

- Masuno ' Ö Yehowa, fa ' abölö-Mö masuno.  
Khö-U manga lulu niha, oi ahöli-höli dödö.  
Lowalangi Yehowa, götö - götö wa ' ara.
- Sumange la' ohe khö-U, mala' ika awö niha.  
Dozi ira manunö, lasunosuno Yehowa.  
Lira lö mo' aetufa, götögötö wa' ara.

**2. FANGA'ARO'Ö WA'OWULO (VOTUM)**

- SA** : Da tahonogö dödöda ba wariawösa, ba ba wa hasambua khö Lowalangi, (Muzizio zato):  
No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

**SATO** : YADUHU

- SA** : Ba u'ila Zo'aya, si dadao ba dadaoma sebua, si no alawa: anönö gosali ahe mbaru-Nia, önö gafi zamösana. Dua mbalubalu mbawa ba dua mbalubalu gaha ba dua ba Wehombo. Ba faoma lamane-mane we'ao khö nawöra: Ni'amoni'ö, Ni'amoni'ö, Ni'amoni'ö Yehowa ngahönö andrö; no anönö lakhömi-Nia guli danö ma'asagörö. HALELUYA.....

**SA** : **Manunö** : BZ. : 452**Haleluya..... Haleluya..... Haleluya.....****SA** : Mangandrö ita :

He Yehowa Lowalangi Ama, Ono ba Eheha Ni'amoni'ö. Möiga mangalulu ba wangandrö saohagölö me no Örorogö, Ö'orifi, ba Öbohouniga fa'omasi-Mö andrö. Ma'andrö khö-U, tohugö wa'ebua dödö-U khöma, rorogöga ba ngawalö de'ala, efa'öga ba wanandraigö, rara dödö bangawalö gabula dödö, tundrehehi faböi alau ndra'aga. Fatöröga ba zomasi Ndra'ugö irugi gamozua, fa makhamö nahia ba zi so Ya'ugö. Si lö mo'aetufa nisuna ba nifolakhömi Ndra'ugö, awö Zo,aya ya,aga Yesu Keriso ba Eheha Ni'amoni'ö, Yaduhu. **(Mudadao zato)**

**3. MANUNÖ moroi ba Mbuku Zinunö Numero 186****186. HEZO YESU SOMASIDO 1**

do = d 3/4  
MM = 69 - 76

1. Hezo Yesu somasido, no humulu dödögu.  
Me töra abua noro, no fahöna horögu.  
No abu sibai dödögu, oya golalöwagu.  
Ha So ' aya zangefa ' ö, fefu horö nilaugu.
2. Lö utaha sa dödögu, na lö möido khö-U, Yesu.  
Ya' ugö dötönafögu, sangefa' ö ba huku.  
Enaö na usöndra gafi, ba zi lö ara sibai.  
Ba usawö fefu hili, fa ukhamö Yesu göi.

#### 4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura **II Moze 20:1-17**

1. Ba iwa'ö daroma li andrö fefu Yehowa, imane:
2. Ya'odo Yehowa Lowalangi, si no mangeheta ya'ugö ba danö Miserayi andrö, ba zi no möi sawuyu ami.
3. Böi so khömö Lowalangi tánö bö'ö, baero ndra'o.
4. Böi fazökhi khöu nadu, ba he famaedo hadia ia, he si so si yawa ba mbanua, ba he si so si tou ba guli danö, ba he si so ba nidanö, barö danö.
5. Böi angalulu khönia ba böi fosumange ia, me no Lowalangi solohu ndra'o, ya'odo andre, Yehowa, Lowalangi, sanguhuku horö ndra ama ba ndraono ba ba ma'uwu mitou, khöra si fatiu tödö khögu,
6. ba si hakhösi tödö sangomasi'ö ya'o ba solo'ö oroisagu; irugi hönö nga'ötö.
7. Böi tötöi döi Lowalangi Yehowa ba waya; lö'ö sa zi lö ihuku Yehowa zanötöi töinia ba waya.
8. Ame'egö tödö luu wolombase andrö, ba we'amoni'ö ya'ia.
9. Önö ngaluo mohalöwö ndra'ugö ba öhalö halöwöu fefu.
10. Ba ero fitu bongi, ba luu wolombase khö Lowalangi Yehowa; böi babaya hadia ia halöwö ba da'ö, he ya'ugö, ba he onou matua, ba he onou alawe, ba he sangai halöwö khöu ira matua ba he sangai halöwö khöu ira alawe, ba he uriföu, ba he si fatewu khöu ba mbanuami bakha.
11. Önö ngaluo sa mege khö Yehowa, ba wamazökhi banua si yaw~a, awö danö, awö nasi, awö nösira fefu; ba ba luu si fitu, ba no molombase ia. Andrö wa no ifahawu'ö luu si fitu andrö Yehowa, ba no i'amoni'ö.
12. Fosumange namau, awö ninau, ena'ö anau nosou ba danö, nibe'e Lowalangi Yehowa khöu.
13. Böi ange'e.
14. Böi ohorö.
15. Böi anagö.
16. Böi böböngö khö nawöu zi lö duhu.
17. Böi isö nomo nawöu. Böi isö wo'omo nawöu ba he sangai halöw~ö khönia ira matua, ba he sangai halöwö khönia ira alawe, ba he öróbaonia, ba he kudonia, ba he hadia ia, fefu, nibayabaya nawöu.

Simanö daroma Li Lowalangi, da tatema'ö faoma sinunö: BZ.Numero 20:1

#### BZ. No: 20. MISUNOSUNO ZO'AYA

1. Misunosuno Zo 'aya, mi bè zumange-Nia.  
Mi 'ebua ' ö döi-Nia, sotöi banua-Nia.  
Me no Ikaoni göi ami, afu mitemawa'au ri, khö Yesu, Sangorifi.

## 5. FANGANDRÖ FANGEFA HORÖ

SA : Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

**Mangandrö ita :**

He Yehowa Lowalangi, si lö ambö fa'abölö, ba si no fahöna fa'omasi. Mafaduhu'ö wa tenga sinangea ndra'aga tanö föna-Mö, me no fahöna höröma si no mafalua i'otarai iraono ndra'aga, he ba wehedema, era'era dödöma, awö gamuatama si lö faudu ba daroma Li-Mö. Andrö möiga khö-U ba wangandrö fa'ahakhö dödö-U, ena'ö Ö'efa'ö khöma horöma andrö si no mafalua, irege sohahau tödö ndra'aga wanohugö fekolima ba zi so fönama si faudu ba zomasi Ndra'ugö. Hakhösi dödö-U khöma Ama, ba be'e aefa khöma horöma andrö ma'afefu, Yaduhu.

SATO : Manunö : BZ. Numero 224 : 1

## 224. NA'UBINI'Ö HORÖGU KHÖ YESU

1. Na'ubini'ö horögu khö Yesu, ba lö usöndra za hono dödögu U'ombakha'ö ngawalö horögu, mo lala dödö.

SA : **Turia Wangefa horö** : "Utayaigö golalöwamö, si mane lawuo, awö horöu, si mane sau. Tema fuli'ö khö-Gu, me no U'orifi ndra'ugö.  
LAKHÖMI KHÖ LOWALANGI SI YAWA.....

SATO : Manunö:

## 450. BA FA'ATULÖ BA GULIDANÖ

1. Ba fa'a tulö ba gulidanö ba niha ni'omasi 'ö andrö  
(mudadao zato)

## 6. FOMBASO TAROMA LI LOWALANGI FÖNA HUHUUO (AB)

: Da tafondrondrongo daroma Li Lowalangi, tehalö moroi ba zura **II Korindro 12:1-10**

1. Lö tola lö usuno ndra'o, ba lö'ö sa gunania; ba alakha sa itörö ligu gangilata andrö, ba fama'ele'ö andrö, khö Zo'aya.
2. So ni'ilagu niha, ba khö Keriso, si no mu'ohe yawa, irugi tölu nga'ötö zorugo, me mewelee'ö fakhe (na ba mboto so ia, ba lö u'ila, ba na baero mboto, ba lö'ö zui u'ila; Lowalangi zangila).
3. Ba no u'ila niha andrö (na ba mboto, ba na baero mboto, ba lö u'ila; Lowalangi zangila)
4. wa no mu'ohe ia ba waradaiso, awö wa no irongo daroma li si tebai lawa'ö niha, si lö tola iwa'ö niha, ha niha ia göi.
5. Da'ö mbörö wa usuno ndra'o, ba na ba khögu, ba lö edönado usunodo, ha ba wa'ambö wa'abölögu andrö.
6. Na edönado sa usuno ndra'o, ba tenga nifolau zambö tödö wolaugu, me si duhu niwa'ögu; ba utaha dödögu, fa lö iwai niha, ha niha ia, ebua ndra'o, moroi ba ni'ilania khögu, ba moroi ba nirongonia.
7. Ba ena'ö böi fayawa ndra'o, ba nifa'ele'ö andrö khögu, me no ebua, ba no mutaru'ö khögu zuzumö ba nösi, mala'ika Zatana, ena'ö igukhugukhui ndra'o, fa böi fayawa ndra'odo.
8. Ba no medölu mangandrödo khö Zo'aya, ena'ö aheta ia khögu.
9. Ba no iwa'ö khögu: Ya'abönö khöu wa'ebua dödögu khöu, a'oi sa so wa'abölö andrö khögu ba wa lö abölö. Andrö wa abölö omasido, ba wa

**lō abōlōdo andrō usuno ndra'o, ena'ō abono khōgu wa'abōlō Keriso andrō.**

**10. Andrō omasi ndra'o wa lō abōlō ba famakao ba fa'afōkhō ba folohi ba fa'atosasa, na bōrō Keriso. Na sambō fa'abōlō ndra'o, awena abōlōdo.**

Ya'ahowu zamondrongo taroma li Lowalangi ba same'e ba dödö.

**SA+SATO** : Yaduhu

## 8. FASÖMBATA

**SA** : Iada'e tebe'e khōda ginötö ba wolohe fasömbata si sambua ni'ofulu khō Lowalangi, nidōnia'ö Pdt. Pengkhotbah.

**SA** : Iada'e tebe'e khōda ginötö ba wolohe fasömbata khō Lowalangi. Ta'osamuzaigö wame'e, he fasömbata si föfōna, ba simanö göi zi mendrua awö zi medölu. Ba si föfōna ua da tafondrongo Li Lowalangi me imane:  
❖ Same'e sumange fangandrö saohagölö, da'ö zamolakhömi Ya'odo, ba zi lö sinegu ba mbuabuania U'oroma'ö wangorifi andrō khō Lowalangi.

**SA** : Tafa'ema wasömbata khō Lowalangi, manunö ita moroi ba Mbuku Zinunö **Numero 331**

### 331. HE ANGI SABÖLÖ <sup>1</sup>

do = es, 2/4

MM = 96 - 104

1. He angi sabölö zamaheu tödö, aetu wanötöna lö fa' abölö.  
Erai howu - howu Zo' aya Sokhö, fa' omasi-Nia sahöli dödö.  
Howu - howu Zo' aya Sokhö ba oi sahöli- höli dödö.  
Howu - howu Zo' aya So khö, fa' omasi - Nia sahöli dödö.
2. Hadia so noro samusi tödömö, ma röfa wa' auri ni' onoromö.  
Erai howuhowu Zo' aya Sokhö, sunosuno Ia si' oroi dödö.  
*Reff*: Howuhowu Zo' aya sokhö ....
3. Na öfaigi gokhöta niha bö' ö, abölö sökhi niwaö Yesu khömö.  
Okhöta ba zorugo lö tebulö, si tebai ni' öli mbuala Zokhö.  
*Reff*: Howuhowu Zo' aya sokhö ....
4. Fefu noro dödö ba gulidanö, so Yesu Sanolo solului khömö.  
Howuhowu-Nia ba wa' aurimö, böi olifu wangandrö saohagölö.  
*Reff*: Howuhowu Zo' aya sokhö ....
5. Ya' ita fefu si fatalifusö, tasuno Yesu lö mamalömalö.  
Me no Itolo ita Irorogö, falukha ita wa' ohahau dödö.  
*Reff*: Howuhowu Zo' aya sokhö ....

*Na no awai la'owuloi/lafa'ema wasömbata, ba owulo tanö furi zangowuloi Fasömbata, lafendrongagö wolohe föna fasömbata, ba la'o'ö gofanöwa note zinunö ( irama lagu ).Fatua lö möi ira wolohe föna, ba imane Sangai Agendre:)*

“Da tafasao wasömbatada andre föna Lowalangi,.....Muzizio ita fefu.....  
Manunö ita moroi ba Mbuku Zinunö numero 261

### 261. YA'E ZUMANGE <sup>1</sup>

*Ira'alawe* □

1. Ya' e zumange fasömbata, ma' ohe sumange Yehowa.

*Iramatua*

*Reff*: Ma'andrö khö-U fahowu'ö zumange ni'ohema khö-Mö

2. Ya'e zumange fasömbata mabe'e soroi ba dödöma.

*Reff*: Ma'andrö khö-U ....

3. Ya'e zumange fasömbata buala si'otarai Nama.  
*Reff*: Ma'andrö khö-U ....
4. Ya'e zumange fasömbata, boto, noso, ba fa'aurima  
*Reff*: Ma'andrö khö-U ....
5. Ya'e zumange fasömbata, lö irugi zomasi dödö-U.  
*Reff*: Ma'andrö khö-U ....
6. Ya'e zumange fasömbata, ma'aohasi gölö Zo'aya.  
*Reff*: Ma'andrö khö-U ....

**FANGANDRÖ** : *( Fangandrö nidönia 'ö fasamösa zangowuloi fasömbata, aefa da 'ö ba lafa'ema ba Danga zangai huhuo, itema 'ö sangai huhuo awena itou 'ö ba dete meza. Ba na so Wasömbata si sambua ni 'ofulu, owasa wanaru ma owasavwamasi, btn ba itema 'ö sangai huhuo si fao taroma Li Lowalangi si faudu ba wasömbata ni 'owuloi andrö )*

## 8. KOOR/VOKAL GROUP

- SA** : Da tafaogö dödöda ba wanuno Lowalangi faoma sinunö ni'olohesi:  
Koor ba Vokal Group
- a. Koor Jemaat
  - b. Kegiata Komisi Perempuan (Koor/Vokal Grup)
  - c. Kegiata sektor 2 (Koor/Vokal Grup)
  - d. Kegiatan Koremda
  - e. ....

## 9. MANUNÖ

- SA** : Da tafa'anö dödöda wamondrondrongo taroma Li Lowalangi, manunö ita moroi Ba Mbuku Zinunö **numero 163**

### 163. UHONOGÖ SIBAI DÖDÖGU

1. Uhonogö sibai dödögu ba wamondrondrongo li Mö Yesu Mangalulu ndra'odo föna-U ba gametahö-Mö ia da 'a Öbayoini Eheha-U Yesu dozigö mbanua samati khö-U. Ubokai dödögu khö-U Yesu nahia daroma li-U. Taroma li-Mö lö fa'atebulö menewi ma 'ökhö ba si 'ogötö'ö lö sa mamalö. Taroma li-Mö si möi fangabölö utema 'ö soroi ba dödö, tolo ba wolo'ö.

## 10. HUHUUO SEBUA

- SH** : Ya'irorogö dödömi, awö gera'erami fa'ohahau dödö andrö, khö Lowalangi, Sabölö moroi ba gera'era niha fefu, ba khö Keriso Yesu. Mangandrö ita.....Yaduhu.
- a. Fombaso taroma Li Lowalangi *Sinunö / Mazmur 48:1-15 (Tuho Migu: Lowalangi Mba'aba'ada / Allah Benteng Bagi Kita)*
  - b. Fanuriaigö
  - c. Nitanö ba dödö. *Sinunö / Mazmur 48:15 (Wa no Lowalangida Lowalangi andrö, si lö mamalömalö, ya'ia zolohe tangada, irugi wa'amate. / Sesungguhnya inilah Allah, Allah kitalah Dia seterusnya dan untuk selamanya! Dialah yang memimpin kita!)*
  - d. Fangandrö Fanga'aro'ö huhuo

- SATO** : Manunö : BZ. Numero 154 : 1

### 154. NO MAFONDRONDRONGO LIU<sup>2</sup>

1. No mafondrondrongo li-U, Lowalangi So 'aya. Tanö ba dödöma ia, fa böi olifuga. Fahowu 'ö ia khöma, ena 'ö ohahau dödöma fefu. Heta ba dödö zi lö sökhi, ma'o 'ö niwa 'ö-U.

## 11. TUHO WAMATI

- SA** : Me no tarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida
- SA+SATO** : ❖ Ya'ö mamati khö Lowalangi Ama si lö ambö fa'abölö, somböi banua si yawa awö danö.  
 ❖ Ya'ö mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amoni'ö, Ono nono alawe Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.  
 ❖ Ya'ö mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

## 12. ANGOMBAKHATA BA MBANUA NIHA KERISO

13. **SA** : Da tafondrongo gangombakhata:.....

## 14. MANUNÖ SA

- : Manunö ita moroi ba Mbuku Zinunö **numero: 283 ayati 1-2**

### 283. KERISO YESU, OHE DANGAGU 1

do = d 2/4

MM = 76 - 84

1. Keriso, Yesu, ohe dangagu, fasao ndra'odo,  
wanörö lalagu.
2. Ya' e ndra'odo, Yesu Keriso,  
lö fa' abölö khögu na ha ya' o.

## 15. FANGANDRÖ SALAHI + FAMATENGE + HOWUHOWU

- SH** : Muzizio ita fefu, mangandrö ita :.....(tetohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

- SH + SATO** : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abölö, awö lakhömi, irugi zi lö aetu. Yaduhu

- SH** : **FAMATENGE + HOWUHOWU** :  
 Mi'angawuli si fao fa'ohahau dödö, ya tobali ami sura Keriso, samaduhu'ö Ya'Ia ba Lala wa'aurimi sero ma'ökhö, ba mitema (tatema) howuhowu Lowalangi :  
 ❖ Ya mufahowu'ö ami/ita Lowalangi, Ya murorogö ami/ita  
 ❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/Khöda  
 ❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

- SATO** : Manunö BZ.Numero 210 ayati 3

### 283. KERISO YESU, OHE DANGAGU 1

do = d 2/4

MM = 76 - 84

3. He Sangorifi, nönö wamati,  
fangabölögu, wogamö fa'auri.

**SH** : YA'AHOWU

**SATO** : YA'AHOWU